

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкурентијски савјет

RJEŠENJE

**po Prijavi namjere koncentracije između privrednih subjekata Dukat mliječna industrija d.d.
Zagreb, Republika Hrvatska i Kim Mljekara Karlovac d.d. Karlovac, Republika Hrvatska**

Sarajevo
Januar 2009. godine



Broj: 01-01-26-040-17-II/08
Sarajevo, 13.01.2009. godine

Na osnovu člana 25. stav (1) tačka e), člana 42. stav (1) tačka d), a u skladu sa čl. 12., 14., 16. i 18. Zakona o konkurenciji („Službeni glasnik BiH“, br. 48/05 i 76/07), po Prijavi namjere koncentracije između privrednog subjekta Dukat mliječna industrija d.d., Marijana Čavića 9, 1000 Zagreb, Republika Hrvatska, zastupanog po zajedničkoj advokatskoj kancelariji Marić Branko, Ivanović Dijana, Dizdarević Višnja i Radovanović Predrag, Mehmeda Spahe 26, 71 000 Sarajevo, Bosna i Hercegovina, i privrednog subjekta Kim Mljekara Karlovac d.d, Mekušanska cesta 51, Karlovac, Republika Hrvatska, zaprimljenoj pod brojem 01-01-26-040-II/08 dana 02.10.2008. godine, Konkurencijsko vijeće, na 80. (osamdesetoj) sjednici održanoj dana 13.01.2009. godine, donijelo je

R J E Š E N J E

1. Ocjenjuje se dopuštenom koncentracija koja će nastati na tržištu proizvodnje i distribucije mlijeka i mliječnih proizvoda u Bosni i Hercegovini, sticanjem kontrole kupovinom većinskog vlasničkog udjela od strane privrednog subjekta Dukat mliječna industrija d.d., Marijana Čavića 9, 1000 Zagreb, Republika Hrvatska, u privrednom subjektu Kim Mljekara Karlovac d.d, Mekušanska cesta 51, Karlovac, Republika Hrvatska.
2. Zbog nepodnošenja Prijave namjere koncentracije u zakonom predviđenom roku izriče se novčana kazna privrednom subjektu Dukat mliječna industrija d.d., Marijana Čavića 9, 1000 Zagreb, Republika Hrvatska, u visini od 20.000,00 KM, koju je dužan platiti u roku od 8 dana od dana prijema ovog Rješenja.
3. Ovo Rješenje o koncentraciji upisuje se u Registar koncentracija.
4. Ovo Rješenje je konačno i bit će objavljeno u „Službenom glasniku BiH“, službenim glasilima entiteta i Brčko Distrikta Bosne i Hercegovine.

O b r a z l o ž e n j e

Konkurencijsko vijeće je dana 02.10.2008. godine zaprimilo Prijavu namjere koncentracije broj 01-01-26-040-II/08 (u daljem tekstu: Prijava) privrednog subjekta Dukat mliječna industrija d.d., Marijana Čavića 9, 1000 Zagreb, Republika Hrvatska (u daljem tekstu: Dukat d.d. Zagreb ili Podnosilac prijave), zastupanog po zajedničkoj advokatskoj kancelariji Marić Branko, Ivanović Dijana, Dizdarević Višnja i Radovanović Predrag, Mehmeda Spahe 26, 71 000 Sarajevo, Bosna i Hercegovina, kojom namjerava steći kontrolu kupovinom većinskog vlasničkog udjela u privrednom subjektu Kim Mljekara Karlovac d.d, Mekušanska cesta 51, Karlovac, Republika Hrvatska (u daljem tekstu: Kim Mljekara).

Uvidom u dostavljenu Prijavu utvrđeno je da ista nije kompletna, te da je treba dopuniti u smislu člana 30. stav (1) Zakona o konkurenciji (u daljem tekstu: Zakon) i čl. 8., 9. i 10. Odluke o načinu podnošenja prijave i kriterijumima za ocjenu koncentracija privrednih subjekata („Službeni glasnik BiH“ broj 95/06), te je zatražena dopuna Prijave dana 08.10.2008. godine dopisom broj 01-01-26-040-

3-II/08, dana 06.11.2008. godine dopisom broj: 01-01-26-040-7-II/08, dana 19.11.2008. godine dopisom broj: 01-01-26-040-11-II/08 i dana 27.11.2008. godine dopisom broj 01-01-26-022-13-II/08.

Na zahtjev Podnosioca Prijave Konkurencijsko vijeće je odobrilo vremenski rok od dodatnih 15 dana za dostavu tražene dokumentacije. Podnosilac prijave je dopunio istu i traženu dokumentaciju dostavio dana 17.10.2008. godine dopisom broj 01-01-26-040-4-II/08, dana 31.10.2008. godine dopisom broj 01-01-26-040-6-II/08, dana 07.11.2008. godine dopisom broj 01-01-26-040-8-II/08, dana 10.11.2008. godine dopisom broj 01-01-26-040-9-II/08, dana 26.11.2008. godine dopisom broj 01-01-26-040-12-II/08 i dana 01.12.2008. godine dopisom broj 01-01-26-022-14-II/08.

Konkurencijsko vijeće je dana 10.12.2008. godine dopisom broj 01-01-26-040-15-II/08 Podnosiocu prijave izdalo Potvrdu o prijemu uredne i kompletne Prijave (u daljem tekstu: Potvrda), u smislu člana 30. stav (3) Zakona.

Podnosilac prijave je naveo, u smislu člana 30. stav (2) Zakona, da je podnio zahtjev za ocjenu koncentracije i tijelima ovlaštenim za ocjenu koncentracije Republike Srbije i Republike Hrvatske.

Konkurencijsko vijeće je utvrdilo da je Prijava poslana dana 28.09.2008. godine, a zaprimljena dana 02.10.2008. godine i da je Ugovor o prodaji i prenosu dionica, koji predstavlja pravni osnov koncentracije, zaključen dana 18.09.2008. godine. Iz navedenog proizilazi da je Podnosilac prijave zakasnio sa podnošenjem Prijave 2 dana, propisano članom 16. stav (1) Zakona.

1. Učesnici koncentracije

Učesnici predmetne koncentracije su privredni subjekt Dukat mliječna industrija d.d., Marijana Čavića 9, 1000 Zagreb, Republika Hrvatska i privredni subjekt Kim Mljekara Karlovac d.d, Mekušanska cesta 51, Karlovac, Republika Hrvatska.

1.1. Privredni subjekt Dukat d.d. Zagreb

Prema izvodu iz sudskog registra Trgovačkog suda u Zagrebu od 01.10.2008. godine privredni subjekt Dukat mliječna industrija d.d., Marijana Čavića 9, 1000 Zagreb, je dioničarsko društvo iz Republike Hrvatske registrovano u sudskom registru ovog suda pod brojem MBS 080307619.

Osnovna registrovana djelatnost privrednog subjekta Dukat d.d. Zagreb je proizvodnja hrane i pića.

Privredni subjekt B.S.A. International, Brisel, Belgija, posjeduje 93,69% vlasničkog udjela u privrednom subjektu Dukat d.d. Zagreb.

Prema izvodu iz registra preduzeća pravnih lica od 09.07.2007. godine, privredni subjekt B.S.A. International, Place du Champs de Mars, Bte 20, 1050 Ixelles, Belgija, registrovan je u Belgiji, kod Federalne javne službe za ekonomiju, mala i srednja preduzeća, preduzetnike i energetiku, pod brojem 0443.205.173.

Osnovne djelatnosti B.S.A. International su poslovi proučavanja tržišta i finansijski holding.

1.1.1. Povezani privredni subjekti Dukat d.d. Zagreb u BiH

Privredni subjekt Dukat d.d Zagreb 100,0% je vlasnik privrednog subjekta Dukat mljekara d.o.o. Gradačac i većinski vlasnik (75,50%) privrednog subjekta Inmer d.o.o. Gradačac.

1.1.1.1. Privredni subjekt Dukat mljekara d.o.o. Gradačac

Privredni subjekt Dukat mljekara, društvo za trgovinu, uvoz, izvoz i usluge d.o.o. Gradačac, Željeznička bb, Gradačac, upisan je u sudski registar Opštinskog suda u Tuzli, Rješenjem suda broj 032-0-Reg-08-000067 od 13.05.2008. godine, registarski uložak broj 32-01-0112-08.

Navedenim Rješenjem Opštinskog suda u Tuzli izvršen je upis promjene naziva i adrese na način da je raniji naziv društva Dukat mljekara, društvo za trgovinu, uvoz, izvoz i usluge d.o.o. Sarajevo,

Rajlovačka cesta bb, zamijenjen nazivom Dukat mljekara, društvo za trgovinu, uvoz, izvoz i usluge d.o.o. Gradačac, Željeznička bb, Gradačac.

Osnovne registrovane djelatnosti privrednog subjekta Dukat mljekara d.o.o. Gradačac su uzgoj goveda za proizvodnju mlijeka i proizvodnja mlijeka, mliječnih proizvoda i sira.

Privredni subjekt Dukat d.d. Zagreb distribuciju svojih proizvoda na relevantno tržište u Bosni i Hercegovini vrši putem svog supsidijarnog društva, privrednog subjekta Dukat mljekara d.o.o. Gradačac, a koji distribuciju proizvoda na tržište BiH vrši preko svoja tri distributivna centra u Sarajevu, Bihaću i Tuzli, kao i preko dva distributera (MCI d.o.o. Široki Brijeg i Dukat d.o.o. Banja Luka).

Privredni subjekti Dukat d.o.o. Banja Luka i MCI d.o.o. Široki Brijeg nisu povezano društvo privrednih subjekata Dukat d.d. Zagreb, Dukat mljekare d.o.o. Gradačac i Inmer d.o.o. Gradačac.

1.1.1.2. Privredni subjekt Inmer d.o.o. Gradačac

Prema izvodu iz sudskog registra Opštinskog suda u Tuzli od 14.10.2008. godine privredni subjekt Inmer d.o.o. za proizvodnju, trgovinu i promet, Željeznička bb, Gradačac, upisan je u sudski registar ovog suda, pod matičnim brojem upisa 1-5884.

Osnovne registrovane djelatnosti privrednog subjekta Inmer d.o.o. Gradačac su uzgoj goveda za proizvodnju mlijeka i proizvodnja mlijeka, mliječnih proizvoda i sira.

Privredni subjekt Inmer d.o.o. Gradačac vrši prodaju svojih proizvoda na tržište BiH preko privrednog subjekta Dukat mljekara d.o.o. Gradačac.

1.2. Privredni subjekt Kim Mljeara

Privredni subjekt Kim Mljekara Karlovac d.d, Mekušanska cesta 51, Karlovac, Republika Hrvatska, registrovan je u sudskom registru Trgovačkog suda u Karlovcu pod brojem MBS 020004667.

Osnovna registrovana djelatnost privrednog subjekta Kim Mljekara je proizvodnja i prerada mlijeka i mliječnih proizvoda.

Vlasnička struktura privrednog subjekta Kim Mljekara prikazana je u Tabeli 1..

Tabela 1.

R.br.	Vlasnik dionica	Vlasnički udio (%)
1.	Hrvatski fond za privatizaciju	(..)* ¹
2.	Ministarstvo poljoprivrede i šumarstva RH	(..)*
3.	SDU za upravljanje državnom imovinom RH	(..)*
4.	Dastra d.o.o.	(..)*
5.	OTP Banka d.d	(..)*
6.	RH Karlovačka Županija	(..)*
7.	Ostali dioničari	(..)*
	Ukupno	100,0

Prema podacima iz Prijave privredni subjekt Kim Mljekara nema povezanih privrednih subjekata niti je (in)direktni vlasnik akcija (10,0% i više) bilo kojeg privrednog subjekta u Bosni i Hercegovini.

¹ (..)* podaci se smatraju poslovnom tajnom u smislu člana 38. Zakona o konkurenciji

2. Obaveza prijave namjere koncentracije

Na osnovu ostvarenog godišnjeg prihoda učesnika koncentracije na dan 31.12.2007. godine proizašla je obaveza prijave namjere koncentracije, u smislu člana 14. stav (1) tačka a) Zakona.

Ukupni ostvareni godišnji prihodi učesnika koncentracije na dan 31.12.2007. godine iznose:

Tabela 2.

Konsolidovani prihod	Dukat d.d. Zagreb		Kim Mljekara	
	KM	KN	KM	KN
Svijet	(..)*	(..)*	(..)*	(..)*
Bosna i Hercegovina	(..)**		-	-

** U naznačeni iznos uračunati su i ukupni prihodi supsidijarnih društava Dukat d.d. Zagreb na tržištu BiH

S obzirom da je ispunjen uslov zajedničkog ukupnog godišnjeg prihoda i da je najmanje jedan privredni subjekt učesnik koncentracije registrovan na teritoriji Bosne i Hercegovine, u smislu člana 14. stav (1) Zakona, učesnici koncentracije obavezni su podnijeti Prijavu.

3. Pravni okvir ocjene koncentracije

Konkurencijsko vijeće je u provođenju postupka ocjene dopuštenosti koncentracije primjenilo odredbe Zakona, Odluke o utvrđivanju relevantnog tržišta („Službeni glasnik BiH“, broj 18/06), te Odluke o načinu podnošenja prijave i kriterijumima za ocjenu koncentracija privrednih subjekata.

4. Pravni osnov i oblik koncentracije

Privredni subjekt Dukat mliječna industrija d.d Zagreb, Republika Hrvatska, u svojstvu kupca, je dana 18.09.2008. godine u Karlovcu, Republika Hrvatska, zaključio sa: Hrvatskim fondom za privatizaciju, Središnjim državnim uredom za upravljanje državnom imovinom Republike Hrvatske i Ministarstvom poljoprivrede, ribarstva i ruralnog razvoja Republike Hrvatske, u svojstvu prodavaca, Ugovor o prodaji i prenosu (..)* dionica (u daljem tekstu: Ugovor) privrednog subjekta Kim Mljekara Karlovac d.d, Mekušanska cesta 51, Karlovac, Republika Hrvatska.

Konkurencijsko vijeće je utvrdilo da je pravni oblik koncentracije sticanje kontrole jednog privrednog subjekta (Dukat d.d. Zagreb) nad drugim privrednim subjektom (Kim Mljekara) kupovinom većine dionica, u skladu sa članom 12. stav (1) tačka b) pod 1) Zakona.

5. Relevantno tržište

Relevantno tržište, u smislu člana 3. Zakona, te čl. 4., 5. i 6. Odluke o utvrđivanju relevantnog tržišta, čini tržište određenih proizvoda (usluga) koji su predmet obavljanja djelatnosti na određenom geografskom tržištu.

Prema odredbi člana 4. Odluke o utvrđivanju relevantnog tržišta, relevantno tržište proizvoda obuhvata sve proizvode i/ili usluge koje potrošači smatraju međusobno zamjenjivim s obzirom na njihove bitne karakteristike, kvalitet, namjenu, cijenu ili način upotrebe.

Prema članu 5. Odluke o utvrđivanju relevantnog tržišta relevantno tržište u geografskom smislu obuhvata cijelu ili dio teritorije Bosne i Hercegovine, na kojoj su tržišni konkurenti aktivni u prodaji i/ili kupovini relevantnog proizvoda pod jednakim ili dovoljno ujednačenim uslovima koji to tržište bitno razlikuju od uslova tržišne konkurencije na susjednim geografskim tržištima.

Analizom relevantnog tržišta učesnika koncentracije Konkurencijsko vijeće je utvrdilo da je relevantno tržište proizvoda u predmetnoj koncentraciji tržište proizvodnje i distribucije mlijeka i mliječnih proizvoda.

Relevantnim geografskim tržištem smatra se tržište Bosne i Hercegovine, jer učesnici koncentracije plasiraju relevantan proizvod na cijeloj teritoriji BiH.

Slijedom gore navedenog, relevantnim tržištem predmetne koncentracije smatra se tržište proizvodnje i distribucije mlijeka i mliječnih proizvoda na cijeloj teritoriji Bosne i Hercegovine.

6. Analiza relevantnog tržišta

Tržišni udjeli učesnika koncentracije i njihovih glavnih konkurenata na relevantnom tržištu proizvodnje i distribucije mlijeka i mliječnih proizvoda u Bosni i Hercegovini prikazani su u Tabeli 3.

Tabela 3.

R.br.	Privredni subjekt	Godišnji promet (u milionima litara)	Tržišni udio(%)
1.	<i>Danube foods</i> Grupa, Holandija	30.000,00	17,0
2.	<i>Meggle</i> , Bihać	30.000,00	17,0
3.	Dukat mljekara d.o.o. Gradačac	26.627,00	15,0
4.	Inmer d.o.o. Gradačac	11.515,00	6,0
5.	Tuzlanska mljekara, Tuzla	15.500,00	9,0
6.	Milkos, Sarajevo	9.470,00	5,0
7.	Ostali (Sappit, Vindija, Šabac, Natura)	55.300,00	31,0
	Ukupno	178.412,00	100,0
	Ukupno (3+4)	38.142,00	21,0

Izvor: Podaci iz Prijave

Prema podacima o tržišnim udjelima učesnika koncentracije i njihovih glavnih konkurenata na relevantnom tržištu (Tabela 3.) vidljivo je da postoji jaka konkurencija budući da postoji veliki broj privrednih subjekata sa relativno malim tržišnim udjelima. Najveće tržišne udjele imaju privredni subjekti *Danube foods* Grupa, Holandija i *Meggle*, Bihać sa po 17,0%, dok zajednički tržišni udio učesnika koncentracije iznosi 21,0%.

7. Ocjena koncentracije

Konkurencijsko vijeće analizom podataka i utvrđenih činjenica, u smislu kriterija člana 17. Zakona (posebno strukture relevantnog tržišta, tržišnih udjela učesnika koncentracije i konkurenata), je utvrdilo da predmetna koncentracije ne može imati za posljedicu sprečavanje, ograničavanje niti narušavanje postojeće tržišne konkurencije na relevantnom tržištu proizvodnje i distribucije mlijeka i mliječnih proizvoda u BiH.

Uzimajući u obzir sve iznesene činjenice i podatke koji su prethodili donošenju predmetnog Rješenja, Konkurencijsko vijeće je ocijenilo predmetnu koncentraciju dopuštenom, u smislu člana 18. stav (2) tačka a) Zakona, kao što je odlučeno u dispozitivu ovog Rješenja.

8. Novčana kazna

Članom 49. stav (1) tačka b) Zakona propisano je da Konkurencijsko vijeće može izreći privrednim subjektima novčane kazne koje ne prelaze 1,0% (jedan) od ukupnog prihoda u prethodnoj godini poslovanja ako ne podnesu prijavu namjere koncentracije u smislu člana 16. stav (1) Zakona.

Članom 16. stav (1) propisano je da su učesnici koncentracije obavezni podnijeti prijavu namjere koncentracije u roku od osam dana od dana zaključenja sporazuma, objavljivanja javne ponude dionica ili sticanja kontrole, zavisno od toga šta nastupi ranije.

Konkurencijsko vijeće je utvrdilo postojanje povrede člana 16. stav (1) Zakona od strane privrednog subjekta Dukat d.d. Zagreb, jer je isti Prijavu namjere koncentracije podnio sa zakašnjenjem od 2 dana.

Slijedom navedenog, Konkurencijsko vijeće je izreklo novčanu kaznu privrednom subjektu Dukat d.d. Zagreb u iznosu od 20.000,00 KM u skladu sa članom 49. stav (1) tačka b).

9. Administrativna taksa

Na ovo Rješenje podnosilac Prijave, u skladu sa članom 2. tarifni broj 107. stav (1) tačka d) pod 1) Odluke o administrativnim taksama u vezi sa procesnim radnjama pred Konkurencijskim vijećem („Službeni glasnik BiH“, broj 30/06), obavezan je platiti administrativnu taksu u iznosu od 2.500,00 KM u korist Budžeta institucija Bosne i Hercegovine.

10. Pouka o pravnom lijeku

Protiv ovog Rješenja nije dopuštena žalba. Nezadovoljna stranka može pokrenuti upravni spor pred Sudom Bosne i Hercegovine u roku od 30 dana od dana prijema ovog Rješenja, odnosno od dana njegovog objavljivanja.

Predsjednik

Ibrica Lakišić

Dostavljeno:

- **Podnosiocu prijave**
- **u spis**
- **u arhiv Konkurencijskog vijeća**